

Selangor stabil walaupun Pakatan berkrisis, jaminan Azmin kepada Sultan
The Malaysian Insider
Jun 23, 2015

Menteri Besar Selangor Mohamed Azmin Ali mengesahkan menghadap Sultan Selangor, Sultan Sharafuddin Idris Shah bagi memaklumkan krisis hubungan Pakatan Rakyat (PR) dan memberi jaminan masalah dalaman itu tidak akan menjejaskan pentadbiran negeri.

Azmin berkata, Selangor akan terus fokus kepada usaha memenuhi aspirasi rakyat melalui penjanaaan pertumbuhan ekonomi dan keadilan sosial.

"Saya juga memaklumkan kepada Tuanku Sultan Selangor tentang masalah dalaman PR di peringkat nasional.

"Saya memberi jaminan kestabilan dan keutuhan kerajaan negeri Selangor untuk terus fokus kepada usaha memenuhi aspirasi rakyat melalui penjanaaan pertumbuhan ekonomi dan keadilan sosial," katanya dalam satu kenyataan, hari ini.

Azmin berkata, dalam pertemuan itu pihaknya turut memaklumkan kepada Sultan Selangor perkembangan terkini dalam usaha memuktamadkan Perjanjian Utama Penstrukturan Semula Industri Perkhidmatan Air Selangor.

Timbalan presiden PKR itu berkata, Sultan Selangor mengambil maklum perkara itu dan mahu dirinya bertanggungjawab membangunkan negeri dan rakyat.

"Tuanku Sultan mengambil maklum tentang penjelasan yang saya berikan dan baginda mahu kerajaan negeri Selangor terus stabil untuk membangunkan negeri Selangor dan melaksanakan tanggungjawab kepada rakyat," katanya.

Azmin minggu lalu dilaporkan berkata, tidak ada keperluan membincangkan krisis PR dalam pertemuan mingguan dengan Sultan Selangor, sebaliknya hanya mahu berbincang tentang pembangunan negeri.

Katanya, tidak wajar mengheret istana dalam krisis politik, dan menafikan kenyataan Setiausaha Agung PKR Rafizi Ramli yang beliau akan bertemu Sultan bagi menjelaskan kekeliruan di Selangor selepas pengumuman berakhirnya kerjasama PR.

Krisis PR memberi tekanan kepada Azmin meneruskan kerjasama pentadbiran antara DAP atau PAS, manakala Pengerusi DAP Selangor, Tony Pua mencadangkan "kerajaan gabungan" bagi mengelakkan pembubaran Dewan Undangan Negeri (DUN) Selangor. – 23 Jun, 2015.

Source:

<http://www.themalaysianinsider.com/bahasa/article/selangor-stabil-walaupun-pakatan-berkrisis-jaminan-azmin-kepada-sultan#sthash.EKJUvW1F.dpbs>